

四庫全書

子部

欽定四庫全書

子部

太平御覽卷

三十七至
四十二

詳校官侍讀學士臣沈咸熙

員外郎臣牛稔文覆勘

總校官降調編修臣倉聖脈

校對官中書臣袁文邵

謄錄監生臣歐陽燮

欽定四庫全書

太平御覽卷三十七

地部二

地下

壤

塵

地下

宋 李昉等 撰

土

塊

淮南子曰東方之極自碣石

碣石山在東北海中

過朝鮮

朝鮮東夷

貫

大人之國

東方有大人之國也

東至日出之次扶木之地青土樹

木之野

皆日所出之地

大皞句芒所司者萬二千里其令曰挺

羣禁開闔通窮室達障塞行優游棄怨惡解救罪免

憂患休罰刑開關梁宣出財和外怨撫四方行柔惠止

剛強南方之極自北戶烏孫之界

北戶曰在其北嚮以為戶

貫顛頊

之國

南方有顛頊之國也

南至委火炎風之野赤帝祝融之所司

者萬二千里

赤帝著明審誤也祝屬也融工也萬物盛長屬續而工也

其令曰爵有

德賞有功惠賢良救饑渴舉力農拯貧窮惠孤寡養老

疾出大祿行大賞起毀宗立無後封建侯立賢輔中央

之極自崑崙東絕恒山

崑崙在西方恒山北岳也

日月之所道

謂二十八

宿舍在地之分也

江漢之所出人民之野五穀之宜龍門河濟

相貫以息壤堙鴻水之洲

禹以息土堙洪水以為中國九州洲水中可居之地

東

至於碣石黃帝后土之所司者萬二千里

黃中色帝道是也道在物

故稱后也

其令曰平而不阿明而不苛包裹覆露無不囊懷

普天無私正靜以和行糜粥養老衰弔死問疾以送萬

物之歸西方之極自崑崙絕流沙沉羽

沈羽弱水也其弱至沈毛羽也

西至三危之國石城金室飲氣之民不死之野少皞蓐

收之所司者萬二千里

少皞白帝之號少皞陰用事物告成也蓐收也萬物蓐收可用

之其令曰審用法誅必辜備盜賊禁奸邪勅羣牧謹貯

聚修城郭補缺竇塞蹊徑隄溝瀆止流水壅谿谷守門

閭陳兵甲選百官誅不法北方之極自九澤

九澤北方之澤也

窮夏海之極

夏海大海也

北至令支之俗

丁令支盡北海胡地

有凍寒

積冰雪電霜霰漂潤羣水之野顓頊玄冥所司者萬二

千里

顓頊黑帝之號項大言大陰用事振
翕而寒也陰閉不見故神為玄冥也

其令曰申羣

禁固閉藏修障塞繕闕梁禁夜樂早閉晏開以索姦人

姦人已得執之必固天節已幾

幾終也

刑殺無赦雖有盛

尊之親斷以法度毋行水毋發藏毋釋刑罰

又曰任一人之能不足以治三畝之宅也循道理之數

因天地之自然則六合不足均也

均平也

又曰盧敖游乎北海

盧敖燕人秦始皇帝以為博
士使求神仙亡而不返也

徑乎

太陰入乎玄關

太陰北
方玄也

至於蒙穀之上見一士焉深目

而玄鬢渡注而鳶肩豐上而殺下軒然迎風而舞顧見

盧敖慢然下臂遜逃水涯盧敖就而視之方卷龜殼而

食蛤蜊

蛤蜊
海蚌

盧敖與之語曰唯敖為背羣離黨窮觀於

六合之外者非敖而已乎敖幼而好遊至長不渝解周

行四極唯北陰之不闕今卒睹夫子於是子殆可與敖

為友乎若士者

音齋

然嘆曰噫子中州民寧肯而遠至

此此猶光日月

言太陽之地
尚見日月

而載列星陰陽之所行四

時之所生此其比夫不名之地猶突奧

言我所游不可
名字之地比盧

教之所行則如突與中也若我南游乎罔罟之野北息乎沉墨之鄉

西窮冥冥之黨東開瀕濛之光此其下無地而上無天

聽焉無眴此其外猶有狀沐之汜狀沐四海與天之際流聲也汜崖也其

餘一舉而千萬里千萬里狀沐之外也吾猶未能之存吾尚未至此地今

子游始此乃於語窮觀豈不亦遠哉然子處矣哉與汗

漫期於九垓之上汗漫不可知也九垓九天也吾不可以久居士舉

臂而竦身遂入雲中盧敖仰而視之弗見乃止駕止其所駕

而居

尸子曰太極之內有君長者東西二萬八千里南北二萬六千里故曰天左舒而起牽牛地右闢而起畢昴

孟子曰天子之地方千里不千里不足以待諸侯諸侯之地方百里不百里不足以守宗廟之典籍

呂氏春秋曰凡四極之內東西五億九萬有七千里南北五億有九萬七千里

又曰長廬子曰山岳河海水金石火木此積形成乎地也

又曰冬之德寒寒不信則地不成剛地不成剛則凍閉不開天地之大四時之化而猶不能以不信成物又况於人

關令內傳曰地厚萬里其下得大空大空角四下有自然金柱輒方圓五千里

土

釋名曰土吐也吐生物也徐州貢土五色色有黃青白赤黑也土赤者鼠肝色也土黑色曰盧盧然解散也土

黃而細密曰埴埴膩也如脂之膩也土色青曰梨似藜草也土色白曰漂漂輕散也

尚書禹貢曰冀州土白壤

孔安國曰無塊曰壤

兗州土黑墳

孔安國曰

色黑而墳起

青州土白墳

徐廣曰黎土也

揚州土塗泥

塗泥水泉濕也

荊州

土塗泥豫州土惟壤下墳壚

孔安國曰壚踈也馬融曰豫州地青三等下者墳

也 雍州土黃徐州土赤埴墳

謝承註曰埴音志

梁州土青黎

孔安

國曰色青黑

又洪範曰五行其五曰土爰稼穡稼穡作甘

孔安國曰土可以種可以

飲甘味
生百穀

尚書帝命驗曰土者金之父也

周書作雒曰周公建太社於國中其壝東青土南赤土
西白土北驪土中央以黃土將建諸侯鑿其方一面土
苴以白茅以土封之故曰裂土

詩曰普天之下莫非王土

又曰孔樂韓土川澤滸滸

周禮地官土曰大司徒辨十二土之名以相民宅知其

利害以任土事

禮記曰範金合土以為臺榭

又曰土弊則草木不長

又曰地一撮土之多及其廣厚載華嶽而不重

又曰衆生必死死必歸土此之謂鬼骨斃於下陰為野

土陰陰也

蔡邕月令章句曰色別曰土

言五方土色各異也

崔寔四民月令曰正月雨水地氣上騰土長昌擲陳根

可拔

春秋元命苞曰土為言吐也子成父道也其氣精以附也陽立於三故成生其立字十加一為土

春秋繁露曰天有十端其土為之一端

春秋考異郵曰后族專則土踊

宋均注曰陰盛也

論語里仁曰君子懷德小人懷土

家語曰孔子曰堯以土德王而尚黃黃土之色也

又曰食土者無心而不息

又曰宰我問於孔子曰聞鬼神之名而不知其所謂敢問孔子曰人生有魂氣有魄氣也神之盛也衆生必死死必歸土此之謂魄魄氣歸天此之謂神

戰國策曰孟嘗君將入秦蘇代曰臣來過於淄上有土偶人與桃梗相與語桃梗語土人曰子西岸上土也八月降雨淄水至則爾殘矣土泥曰吾西岸之土也土則復為岸矣今子東國之桃梗也雨下水至流子而去則水漂漂將何如邪

漢書張釋之傳曰文帝拜釋之為廷尉人有盜高廟坐
前玉環文帝怒下廷尉治奏當棄市上大怒釋之頓首
謝曰假令愚民盜長陵一抔土陛下復何以加其法乎
後漢書曰朱浮與彭寵書曰亦猶河濱之人捧土以塞
孟津

謝承後漢書曰東郡趙資病自置小素棺使人取乾黃
土二十石細擣篩之遺令亡後置土棺底厚一尺內屍
於中以土壅之

又曰范訓母亡以布囊盛土負以成壙

魏志曰魏明帝起芳林園建昭陽殿公卿以下至於學生莫不展力帝乃躬自握土以率之

後漢書曰高昂父次同語人曰吾四子皆不肖我死後豈有人與我一鍬土邪及次同死昂大起塚封之曰此老平生畏無一鍬土今日被壓竟知之否

唐書天寶十三載冊楊國忠為司空其日雨土

江表傳曰孫權討袁術舉兵攻皖城術閉門自守糧食

盡士女或丸土而吞之

晉安帝紀曰劉敬宣在鮮卑夢丸土而服之既而占焉
或荅曰此服土吞丸也既覺而喜曰丸者桓也既吞矣
我復本土矣旬日中聞桓玄敗得來歸

世本曰廩君名務相姓巴與樊氏暉氏相氏鄭氏凡五
姓俱出皆爭神以土為船雕文畫之而浮水中其船浮
立為君他船不能浮獨廩君船浮因立為君

蜀王本紀曰蜀王獵於褒谷見秦王以金一筒遺蜀王

蜀王報以禮物盡化為土秦王大怒臣下拜賀曰土地也今秦當得蜀矣

崔鴻十六國春秋後趙錄曰建武十二年沙門吳進言於帝曰胡運將衰晉當復興若役晉人以壓其氣帝於是使尚書張郡發近郡男女十六萬車十萬乘運土築

華林園及長墟

一作墟

於鄴北廣長五十里

白虎通曰土在中央中央者主吐含萬物

聖證論曰孔鼉云能吐生百穀謂之土

雷煥別傳曰煥與張華見異氣起斗牛之間煥曰此寶劍也拜煥豐城令到縣掘獄基入四十餘尺得一石函中有雙劍琢錯文采翳而未明初經南昌遣人取西山北巖下土二升黃白色拭劍光艷照耀莫不驚愕張公得劍喜置坐側曰此土南昌西山北巖土也不如華陰山赤土封一斤與君荅書曰詳觀豐城劍真干將也君更用赤土磨拭愈益精明

晉書苻堅傳曰初秦之未亂也關中土無火而煙氣火

起數十里月餘不滅

宋躬孝子傳曰宗承字世林父資喪葬舊塋負土作墳不役童僕一夕間土壤高五尺松生焉

荊州先德傳曰羅獻守巴東吳遣盛曼說獻合從之計詣獻求借城門獻遣參軍楊宗謾曰城中土一撮不可得何言城乎

三輔舊事曰成帝作延陵及起廟竇將軍有青竹田在廟南恐犯蹈之言作陵不便乃徙作昌陵取土十餘里

土與粟同價

關中記曰未央宮蕭何所造周迴二十三里疏龍首山土為殿基

宣城記曰江矩吳時為廬江太守以清稱徵還船輕皆載土時歲暮逐除者就乞所獲甚少江乃語之逐除人見而去

盛弘之荊州記曰武當縣有一谿岸土色鮮黃乃可取義興記曰陽羨縣塘西潛壤中有黃土色如精金

法顯記曰阿育王昔在小兒時當道戲遇迦葉佛乞食
小兒欣喜即以一掬土施佛佛持還泥經行地因此果
報作戲輪王

晉太康地記曰城陽姑募縣有五色土

吳郡記曰吳縣餘杭山出白土光潤如玉

墨子曰商王紂不德雨土於幾內

孫卿子曰孔子謂子貢曰賜未知為人下者其猶土也
深掘之而得甘泉樹之而五穀蕃草木植焉禽獸育焉

生則主焉死則入焉多其功而不德為人下者猶土也

韓詩外傳說苑並載也

申子曰四海之內六合之間曰奚貴曰貴土土食之本也

淮南子曰伊尹曰興土功也修脚者使之蹠蹠強脊者使之負土

淮南萬畢術曰東行馬蹄中土令人卧不起

取東行白馬蹄下土

三家井中泥合土而和之置臥人臍上即不能起

又曰竈之土不思故鄉

取竈前土三寸方半寸厚一寸將之遠出令人不思故鄉也

裴玄新言曰俗間有土公之神云土不可動玄有五歲女孫卒病詣市卜云犯土玄即依方治之病遂愈然後知天下有土神矣

物理論曰游濁為土土氣合和而庶類自生

抱朴子曰土飯瓦甃不療於飢

壤

說文曰壤軟土也

尚書康誥曰賓奉珪幣執壤奠

孔安國注曰賓諸侯執壤地所出而贊奠

尚書孔安國注曰土無塊曰壤

周禮地官土司徒職曰大司徒辨十二壤之物而知其種教稼穡樹藝

史記曰李斯上書曰泰山不讓土壤故能成其高河海不擇細流故能就其深

王隱晉書解結問別駕治中曰河北白壤高良何故少
人士每以三品為中正

山海經曰洪水滔天鯀竊帝息壤堙洪水不待帝命祝

融殺鯀于羽郊

郭璞注曰息壤謂土自長故可以堰水也漢元帝時臨陰縣地埆長六里高二

丈即息壤也

帝王世紀曰禹葬會稽下不及泉上不通臭既葬收餘壤為壘

蕭廣濟孝子傳曰巴郡文讓母死墳土未足耕一畝地為壤羣鳥數千銜所作壤以著墳上

關中記曰長安地皆黑壤城今赤如火堅如石

管子曰蟻冬居山之陽夏居山之陰蟻壤寸而有水乃掘遂得水

塊

禮記檀弓記曰寢苦枕塊

左傳曰晉文公過衛出五鹿乞食於野野人予之塊公怒舅犯曰天賜也稽首受而載之

國語楚靈王不君三軍叛王于乾谿王親獨行見其洧人疇枕其股而寢于地王寐疇枕王以塊而去之

徐整長歷曰黃帝時風不鳴條雨不破塊也

淮南子曰土勝水者非一堞塞江也

塵

詩曰無將大車維塵冥冥

禮記曰前有埃塵則載鳴鳶

鄭玄注曰鳶鳴則將風

又曰為長者糞之禮必加帚於箕上以袂拘而退其塵不及長者

左傳曰晉楚戰狐毛設二旆而退之欒枝使輿曳柴而偽

遁

曳柴起塵者
詐言聚衆徒

又曰潘黨望其塵使騁而告曰晉師至矣楚人懼遂出

陳

史記曰鈞弋夫人死雲陽暴風揚塵

前漢書曰長安中奸猾浸多受財報仇相與探丸得赤丸者斫武吏黑者斫文吏城中薄暮起塵死傷橫道枹鼓不鳴

謝承後漢書曰范史雲為萊蕪長閭里歌之曰甌中生

塵范史雲

魏志曰歲西北大風塵埃蔽天十餘日間何晏乃誅
晉書王導傳曰庾亮以望重地逼出鎮於外南蠻校尉
陶稱聞說亮當舉兵勸導密為之防導曰吾與元規休
戚是同悠悠之談宜絕智者之口元規若來吾便角巾
還第復何懼哉時亮執朝廷之權趨向者多歸之導內
不能平常遇西風塵起舉扇自蔽徐曰元規塵汗人
博物志曰徐州人謂塵土為蓬塊吳人謂塵土為埃塊

崔鴻十六國春秋前秦錄曰慕容冲叛苻堅遣平原公暉討之冲乃令婦人各將一囊盛塵皆令騎牛服文采衣執持長槊於陣後冲晨攻暉兵刃交接昌言班隊何在於是奔競而進皆毀囊揚塵埃霧連天莫測多少暉衆大潰

家語曰顏回拾甑中塵

玄晏春秋曰余家素貧晝則苦於作勞夜則甘於疲寢三時之際書皆生塵

山海經曰黑水之南有玄蛇食塵

又曰大人國有青蛇頭方食塵

帝王世紀曰黃帝夢大風吹天下塵垢皆去又夢人執千鈞之弩驅羊數萬羣帝嘆曰風為號令垢去土后在也豈有姓風名后者哉千鈞之弩異力能遠驅羊數萬羣牧民為善天下豈有姓力名牧者哉得風后於海隅得力牧於大澤

神仙傳王方平曰聖人言東海中行復揚塵

老子曰和其光同其塵

莊子曰野馬也塵埃也

淮南子曰地不滿東南故水潦其塵埃歸焉

又曰蒙塵而欲無昧涉水而欲無濡不可得也

林語曰劉道真年十五六在門前弄塵垂鼻涕至胸

葛洪肘後方曰治暈死方取道中熟塵土以積暈人心

下即活

楚辭曰安能以皓皓之白蒙世俗之塵埃乎

宋謝莊月賦曰陳王初喪應劉端憂多暇綠苔生閣芳
塵凝榭

曹子建洛神賦曰羅襪生塵

古詩云君為清路塵妾為濁水泥

又曰京洛多風塵素衣化為緇

世說虞公善歌發聲動梁塵

李康遊仙序曰人生天地之間若流電之過戶牖輕塵
之棲弱草

兵書曰名將望塵知馬步之多少也

晉書曰潘岳諂事賈謐望塵而拜

又曰簡文帝性冲澹所居凝塵滿席湛如也

謝繹蘭亭詩曰千載同一朝沐浴陶清塵

太平御覽卷三十七

欽定四庫全書

太平御覽卷三十八

宋 李昉等 撰

地部三

叙山

崑崙山

鍾山

玉山

蓬萊山

方丈山

瀛洲山

終南山

叙山

釋名曰山頂曰冢亦曰巔亦曰椒山脊曰岡山大而高

曰嵩

嵩稱高也今中岳嵩山蓋依此亦作崧

小而高曰岑銳而高曰嶠卑

而大曰扈小而聚曰巋上大下小曰巘山有草木曰岵

音戶無草木曰垓

古未切

石戴土曰岨土戴石曰崔嵬

此因形而

名山東曰朝陽山西曰夕陽

隨日照而名之

山足曰麓山穴曰

岫山邊曰崖崖之高曰巖上秀曰峯陬隅高者曰岵山

坡曰坂山三襲曰陟山再成曰莫一成曰垓山中絕曰

陁未及上曰翠微

一說山氣青縹色曰翠微

山屬曰嶧

言絡繹相連今魯國有嶧

山絕石相積構連屬成山蓋謂此也

山狹而高曰巒小曰墮

它果反謂山形長狹者荆

州人謂之巒詩云墮山喬岳

土山曰阜

阜高也言其高厚

曲阜曰阿大阜曰

陵小陵曰丘山精曰夔亦曰跂亦曰雲陽祭山曰廐懸

廐角毀反自山頂曰冢以下並說文釋名爾雅也

易曰兼山艮

又曰地中有山謙

又說卦曰山澤通氣

又曰艮為山

詩云如南山之壽不騫不崩

又曰節彼南山

楊又易卦序論云險而止山也險而動泉也動靜皆蒙

險故曰山

書禹貢曰導岍及岐至于荆山踰于河

孔安國注曰此謂梁山龍門也

壺口雷首至於太岳底柱析城至于王屋

諸山在冀州南阿之地也

大行恒山至于碣石入于海

此二山者連延東北接碣石而入滄海百川經此衆

山禹皆治之也，不可勝名。故以滄海山川言之也。

西傾朱圉鳥鼠

西傾朱圉在積石以東為

鳥鼠謂所出在隴

至于太華

相首尾而東也

熊耳外方桐栢至

西三者雍州之南

于陪尾

四山相東南在豫州絡經熊耳經外方淮南桐栢經陪尾凡此皆先舉所施功之山於上而後

條列所治水于下以相備也

導嶓冢至于荆山

嶓冢山在梁州荆山在荊州也

內方

至于大別

內方大別二山名在荊州漢所經

岷山之陽至于衡山

岷山江所

出在梁州衡山

江所出在荊州

春秋傳曰山有木工則度之

禮記曰今夫山一拳石之多及其廣大草木生之禽獸

居之寶藏興焉

又曰天子祭名山大川五岳視三公

視其牲
器之數

又曰天不愛其道地不愛其實人不愛其情故山出器

車

又曰居山不以魚鼈為禮

爾雅曰土高有石曰山

釋名云山產也言產萬物

說文曰山宣也氣散生萬物有石而高

春秋元命苞曰山者氣之苞所以含精藏雲故觸石而出

春秋說題辭曰山之為言宣也含澤布氣

韓詩外傳曰夫山萬人之所觀仰材用生焉寶藏植焉飛禽萃焉走獸伏焉育物羣而不倦有似乎仁人志士是仁者所以樂山也

尚書大傳曰孔子曰夫山者嵬嵬然草木生焉禽獸蕃焉材用植焉四方皆無私焉出雲雨以通乎天地之間陰

陽和合雨露之澤萬物以成百姓以饗此仁者之樂于山也

國語曰禹封九山者土之聚也

河圖曰蟠冢山上為狼星武關山為地門上為天高星主圉圍荆山為地雌上為軒轅星大別為地理天以合地以通三危山在鳥鼠之西南上為天苑星政山在崑崙東南為地乳上為天糜星汶山之地為井絡帝以會昌神以建福上為天井星桐栢為地穴鳥鼠同穴山之

幹也上為掩畢星熊耳山地門也精上為畢
莊子曰函車之獸分而離山不免網罟之患

又曰山積卑而成高

管子曰凡天下名山五千三百七十出鐵之山三千六
百有九上有丹砂者下有黃金上有磁石者下有銅金
上有綠石者下有鉛錫上有赭下有鐵

淮南子曰牛蹄之涔無徑尺之鯉塊阜之山無尋丈之
材營宇狹小而不能容巨大也

孫卿子曰不登高山不知天之高不臨深谿不知地之厚不聞先王之道不知學問之大

呂氏春秋曰何謂九山會計泰山

會計即會稽也泰山在陽山郡是為東岳

王屋首山泰華岐山太行羊腸孟門

岐山在扶風美陽縣西北周家所邑

也太行在河內野王縣北羊腸其山盤紆如羊腸狀在太行晉陽北孟門太行是也

說苑曰土積成山則豫章生焉

又曰五嶽者何謂也泰山東嶽也霍山南嶽也華山西嶽也恒山北嶽也嵩高中嶽也五嶽何以視三公能

大布雲雨焉能大歛雲雨焉觸石而出膚寸而合不崇朝而雨天下施德博大故視三公也

白虎通曰東岱山岱者言萬物相代於東方南衡山者上承景宿銓德均物故曰衡曰西華山華者獲也萬物孰成乃有獲也北恒山恒常也言萬物伏藏於北方有常度也中嵩山嵩者高也言峻大處中以領四方

地鏡圖曰八名山必齋五十日牽白犬抱白雞以白鹽一升山神大喜芝草異藥寶玉為出未到山百步呼曰林

兵此山之主者名知之却百邪

關令尹喜內傳曰五百歲天下名山一開開時金玉之
精涌出

晏子春秋曰齊大旱景公召羣臣問曰天久不雨矣民
且有饑色吾卜崇在高山廣澤寡人欲祠靈山可乎晏
子曰夫靈山以石為身以草木為毛髮天不雨髮將焦
身將熟獨不欲雨乎祠之何益

山海經曰周穆王周歷四荒名山大川靡不登躋東昇

王公之堂西宴王母之廬

列子傳曰共工與顓頊爭天下怒而觸不周山

魏志曰明帝起景陽山於芳林園

晉書曰顧愷之好遊會稽人問山川之美對曰千巖競秀萬壑爭流

宋書曰謝靈運好登山常著木屐上山則去前齒下山則去後齒

漢書曰李廣利刺山而泉涌

楚詞曰山中兮不可以久留

古詩曰上山採靡蕪下山逢故夫

崑崙山

爾雅曰西北之美者有崑崙之璆琳瑯玕焉

史記夏禹本紀曰河出崑崙其上有灋泉華池

漢書曰張安世房中歌詩云天馬來兮開遠門竦余身
兮遊崑崙

博物志曰崑崙從廣一千里神山也出五色雲氣五色

流水其白泉水東南流入中國名為河也

河圖括地象曰崑崙之山為地首上為握契滿為四瀆
橫為地軸上為天鎮立為八柱

河圖括地象曰崑崙之墟有五城十二樓河水出焉四
維多玉

龍魚河圖曰崑崙山天中柱也

紀年曰周穆王十七年西征至崑崙丘見西王母

穆天子傳曰天子昇於崑崙之丘以觀黃帝之宮增封

於崑崙山上

又曰天子遂宿於崑崙之阿赤水之陽

山海經曰周穆王至崑崙之丘遊軒轅之宮眺鍾山之嶺勒石西王母之山紀迹玄圃之上

又曰槐江之山實惟帝之平圃南望崑崙其光熊熊有木焉其狀如棠而黃華赤實其味如李而無核名曰沙

棠食之令人不溺

草木之美者沙棠也

又曰崑崙之墟方八百里高萬仞上有木木長五尋大

五園旁有井以玉為楹欄楹有五門門有開明獸守之
百神所在

又曰崑崙之丘有神人面虎身文尾其下有弱水泉
徐整長曆曰北斗當崑崙上

真人關尹內傳曰萬億萬歲有一大水崑崙飛浮是時
飛仙迎取天王及善民安之山上也

葛仙公傳曰崑崙山一曰玄圃臺一曰積石瑤房一曰
閼風臺一曰華蓋一曰天柱皆仙人所居

列仙傳曰赤松子者神農時雨師也服水石以教神農能入火不燒至崑崙山上常止西王母石室中隨風雨上下炎帝少女追之亦得仙俱去至高辛時復為雨師今之雨師是

又曰王母者神人也人面蓬頭髮虎牙豹尾善嘯穴居名西王母在崑崙山下

神仙傳曰東郭延者山陽人服雲母散能夜書有數十人乘虎豹來迎比鄰盡見之與親友辭別而去云詣崑

崑崙山

神異經曰崑崙有銅柱焉其高入天所謂天柱也圍三千里周圓如削銅柱下有屋壁方百丈

搜神記曰崑崙之山是惟帝之下都環以炎火山

十洲記曰崑崙號曰崑陵山也上有金臺玉闕元氣之所合天帝君治處

玄元記曰崑崙西南山周環三萬里巨蛇繞之得三周蛇長九萬里

尸子曰赤縣神州實為崑崙之墟玉紅之草生焉食其一實而醉卧三百歲而後寤

呂氏春秋曰菜之美者有崑崙之蘋也

淮南子曰崑崙山上有層城九重上有木禾其條五尋珠樹玉琬樹不死樹在其西沙棠琅玕在其東絳樹在其南瑤樹在其北

又曰崑崙之玉瑱而塵垢不能汚也

抱朴子曰蔡譴者自云被謫至崑崙初譴還人問云崑

崙似何答曰天不問其高幾里要於仰視之去天過十數里也

崔鴻十六國春秋前趙錄曰東平王劉約癸亥卒一指猶暖遂不殯殮至於甲戌乃蘇言見劉淵於不周山經五日遂復從至崙崙山三日而復返於不周見諸王公卿將死者悉在焉

又曰酒泉太守馬岌上言酒泉南山即崙崙之體也昔周穆王見西王母樂而忘歸即在此山山有石室王母

堂珠璣鏤飾煥若神宮

鍾山

穆天子傳曰自密山以至鍾山四百六十里其間盡澤多怪獸奇魚

又曰天子北昇於春山之上望四野

郭璞注曰春音鍾也

曰是惟

天下之高山

山海經曰黃帝取崧之玉榮投之鍾山之陰以為玉種

又曰鍾山其子曰鼓

此亦神名名之為鍾山之子耳其類皆見歸藏啟筮也

其狀

人面龍身帝乃戮之鍾山之東也

又曰鍾山之神名曰燭陰

燭龍也是
燭九陰也

視為晝瞑為夜吹

為冬呼為夏

魯女生列傳曰鍾山之棗其大如餅

十洲記曰北海外有鍾山自生千芝及神草此洲受太
玄生符錄仙家數十萬耕田種芝草課計頃田種稻

玄中記曰北方有鍾山焉山有石首如人首左目為日
右目為月開左目為晝開右目為夜開口為春夏閉口

為秋冬

淮南子曰鍾山之玉灼之以爐炭三日三夜其色不變
論衡曰鍾山之上以玉抵鵲彭蠡之濱以魚食犬

玉山

穆天子傳曰天子西征東還乃循黑水至於羣玉之山
天子於是取玉板玉器服物載玉萬候

雙玉為珽半璧
為候見左傳

山海經曰玉山是西王母所居

此山多玉石
因以為名

帝王世紀曰崑崙之北玉山之神人身虎首豹尾蓬頭

外國圖曰西王母國前弱水中有玉山白兔

關駟十三洲記曰赤水西有白玉山山有西王母堂室

蓬萊山

漢書王莽傳曰有竒士大十圍自言巨無霸出於蓬萊
山輜車不能載三馬不能勝焉

武帝紀曰太初元年十二月祀后土臨渤海望祀蓬萊
十洲記曰蓬萊山外別有海謂之溟海無風而洪波百
丈有九氣丈人九天真君宮

玄中記曰東海之大者有巨鼇馬以背負蓬萊山

列子曰渤海之東有大海其中有山一曰岱輿二曰負嶠三曰方壺四曰瀛洲五曰蓬萊山上臺觀皆金玉禽獸皆純縞珠玕之樹皆聚生實皆有滋味食之不老不死人皆仙聖一日一夕飛翔來往

山海經曰蓬萊山海中之神山非有道者不至

列仙傳曰安期生瑯琊阜鄉人時人皆言千歲秦始皇與語賜金璧數千萬出阜鄉亭皆置去留以赤玉鳥一

量為報曰後千歲求我蓬萊山下

又曰負局先生語似燕岱間人吳市中磨鏡一錢因磨之輒問主人得有無疾苦輒出紫赤藥與之莫不立愈後上吳山懸藥下與萬姓欲去時曰吾欲還蓬萊山神仙傳麻姑謂王方平曰自接待以來三見海中變為桑田蓬萊之清淺也

方丈山

漢書曰太液池有方丈瀛洲象海中神山焉

列仙傳服閭者不知何人常止莒往瀛海邊諸祠中有
三仙人於祠中博賭瓜使服閭擔黃白瓜數十頭教令
瞑目及覺乃在方丈山

瀛洲山

史記封禪書曰齊宣王燕昭王使人求蓬萊方丈瀛洲
此三神山傳在海中去人不遠望之如雲中及至則三
山反在水中欲至風引船而去莫能至者仙人不死藥
皆在焉黃金白玉為宮闕

終南山

書曰終南惇物至于烏鼠

謂終南惇物二山
西出至于烏鼠山

詩曰終南何有有條有枚

漢書曰太一山又為終南山五經要義太一山在扶風
武功縣則終南太一不得為一山明矣蓋終南南山之
總名太一山之別號

唐書曰盧藏用初隱終南山後出任道士司馬子微歸
天台山羣公祖道藏用指終南山曰此山甚有佳處何

必天台山子微曰以吾觀之此乃仕宦之捷徑爾藏用有慙色

又曰文宗開成二年詔曰每聞經書舊說以為終南山興雲祈必有雨若晴霽雖密雲至地竟不需濡况茲山北面闕庭自當以時修其望祀寵數宜及今聞都無祀宇終南山未備禮秩命有司即時建立

關中記曰終南山一名中南言在天下居都之南也又曰終南太一左右三十里內名福地

皇甫謐高士傳曰四皓共入商洛隱地肺山以待天下
定漢高祖徵之不至乃深自匿終南山

辛氏三秦記曰太一在驪山西去長安二百里山之秀
者也中有石室靈芝常有一道士不食五穀自言太一
之精齋潔乃得見之其狀似仙人山一名地肺可避洪
水俗云上有神人乘船行追之不可及

方輿記曰東方朔謂天之大阻其終南多金銀鐵玉石
樟檀異類之物皆百工取給萬姓所仰足也

風土記曰王莽以皇后有子通子午道從杜陵直抵終南

太平御覽卷三十八

欽定四庫全書

太平御覽卷三十九

宋 李昉等 撰

地部四

嵩山

華山

泰山

恒山

衡山

霍山

嵩山

釋名曰嵩字或為崧山大而高曰嵩

詩曰崧高維嶽峻極于天維嶽降神生甫及申

國語曰夏之興也祝融降于崇山韋昭注曰崇嵩字古通用夏都陽城嵩山在焉

白虎通曰中央之嵩獨加嵩高字者何中央居四方之中而高故曰嵩高山

續漢書曰武帝禮祭中嶽聞有呼萬歲聲三於是以三百戶封奉祠命曰嵩高為嵩呼也

孫嚴宋書曰高祖表曰沙門釋法義于嵩高廟所食壇
下得玉璧三十二枚黃金一餅符彩潤潔河南太守毛
修之以靈岳降瑞送諸神府

列仙傳王子喬周靈王太子晉也好吹笙作鳳鳴遊伊
洛之間浮丘公接以上嵩高山三十餘年後于山上見
桓良曰告我家七月七日待我緱氏山頭至日果乘白
鶴駐山巔望之不得到舉手謝時人數日而去

漢武內傳曰漢武帝夜夢與少君俱上嵩高山半道有

繡衣使者乘龍持節從雲中下言太一請少君覺告廷臣曰如朕夢少君將捨朕去矣

劉義慶世說曰嵩高山北有大穴晉時有人誤墜穴中見二人圍棋下有一杯白飲與墜者飲氣力十倍棋者曰汝欲停此否墜者曰不願停棋者曰從此西行有天井其中蛟龍但投身入井自當去若餓取井中物食之墜者可半年乃出蜀中因入洛問張華華曰此仙館也所飲者玉漿所食者龍肉石髓耳

崔鴻十六國春秋前秦錄曰王猛至深山見一老父據胡牀鬚鬢皓然猛進拜老父曰王公何因拜也遣人送猛出出顧視乃嵩高山也

山海經曰大室之山

即中嵩山今在陽城縣西也

其上有木焉其狀

如梨赤理服者不妬有草焉其狀如禾服者不昧上多

美石

次玉者也

嵩高山記曰漢有道士從外國將貝多子來于嵩岳西脚下種之并立浮圖今有四樹與衆木有異一年三花

花白色其香如桂嵩山最是栖神靈藪也東出一里有自然五穀神芝仙藥東脚下有衆果樹云是漢果園後有小山名牛山多香樹昔有婦女妊身三十月生子五歲便入嵩高學道通神明為母立祠號開母祠又有三臺山漢武東巡過此山見三學仙女遂以為名又一石室有自然經書飲食至前石柱似承露盤有水暗滴下食之一合與天地相畢中頂南下二百步亦有岳廟畫為神像有玉人高五寸玉色光潤相傳曰明公山人或

失之經句乃見

山海經曰少室之山有木焉名曰帝休葉狀如楊枝五
衢黃花黑實服者不怒其上多玉其下多鐵其中多鯨
魚得其食者無蠱疾可以禦惡服之不怒郭氏注云陽
城西谷名季室亦曰少室山巔有白玉膏服之可為仙
又戴延之西征記曰少室山中多神藥漢武帝築登仙
臺在其峯

郡國志云少室山一名黍室山負黍城在南故因山以

名城也

又少室有金陵人往視則有白霧起迷人

雜道書曰少室之陽高於平地八百六十丈方十里可避兵水之災

華山

禮記曰及其廣厚載華嶽而不重

范蔚宗後漢書張楷字公超隱居弘農山學者隨之所居成市能為五里霧後華山南遂有公超霧市

唐書曰李適之代牛仙客為右相累封清河縣公與李
林甫爭權不協適之性疎為其陰中林甫常謂適之曰
華山有金鑛採之可以富國上未知適之心善其言他
日從容奏之玄宗大悅顧問林甫對曰臣知之久矣然
華山陛下本命王氣所在不可穿鑿臣不敢上言帝以
為愛已薄適之言疎之

白虎通曰西方為華山者何少陰用事萬物生華故曰
華山

武帝內傳曰魯女長樂人初餌麻及水絕穀八十餘年日
更少壯色如桃花一旦與故人別云入華山去後五十
年先相識者逢女華山廟前乘白鹿從玉女三十人并
謝其鄉里親戚故人

崔鴻十六國春秋前燕錄曰石虎使人探策于華山得
玉板

山海經曰華山塚也

塚者神鬼之所合也

其祀之以太牢

又曰秦華之山削成而四方其高千仞其廣千里

郭璞注曰

山上明星玉女主持玉漿得服
之即神仙之道僉無不通也

其有虵曰肥遺六足四

翼見則天下旱

列仙傳曰馬明生從安期先生受金液神丹方乃入華
陰山中合金神丹昇天也

又曰修羊公者蜀人也華陰山石室中有懸石榻卧其
上石盡穿陷

又曰毛女者在華陰山中獵師世世見之體生毛自言
秦始皇宮人也

又曰呼子先者漢中關下卜師也壽百餘歲臨去呼酒家嫗曰急裝當與嫗共應中陵王召夜有仙人持二茅狗來先持一與酒家嫗得俱騎乃龍上華陰山也

周禮曰豫州其鎮山曰華山

華山記曰山頂有池生千葉蓮花服之羽化因曰華山

又曰山有三峯

謂蓮花毛女松檜也

辛氏三秦記曰華山在長安東三百里不知幾千仞如半天之雲

晏子春秋曰君子若華山松柏既多望之自識

薛綜注西京賦曰華山對河東首陽山黃河流于二山之間古語云本一山當河河水過之而曲行河神巨靈以手擘開其上以足蹈離其下中分為兩以通河流今觀手迹於華嶽上足迹在首陽山下俱存焉

韓子曰秦昭王使工人施鈎梯上華山以松柏之心為博箭長八尺棊長八寸勒之曰昭王嘗與天神博于此周易是謀類曰西岳亡玉羊鄭玄注曰玉羊華山之精

山海經曰小華

即少華也

其木多荆杞鳥多赤鷩可以禦火

泰山

詩曰泰山巖巖魯邦所瞻

傳曰鄭伯請釋泰山之祀而祀周公以泰山之祊易許田
公羊傳曰山川有能潤千百里者天子秩而祭之觸石
而出膚寸而合不崇朝而雨遍乎天下者唯泰山雲爾
語曰季氏旅于泰山子謂冉有曰女弗能救與對曰不
能子曰嗚呼曾謂泰山不如林放乎

白虎通曰王者功成封禪必于泰山者何萬物之始交代之處也

史記曰漢武帝封泰山白雲起封中

漢書曰武帝封泰山禪石閭應劭注曰石閭在泰山下南方土人言仙人閭

應劭漢官儀曰泰山東南名曰觀者雞一鳴時見日始欲出長三丈所觀者望見長安其高如視浮雲其峻如無道徑望人如孟升或以為小白石或以為冰雪視巖

石松鬱鬱蒼蒼如雲中

晉書曰張忠隱于泰山教授弟子教以形不以言符堅徵之及至堅賜以衣冠辭曰年朽髮落不堪衣冠請以野服入覲從之後乞還堅以安車送之行達華山嘆曰我東岳道士歿于西岳命也及關而死

道書福地記曰泰山多芝草玉石下有洞天周迴三千里鬼神之府

袁山松後漢書曰光武封泰山雲氣成宮闕

風俗通曰古封泰山禪梁甫舊說岱宗上有金篋玉策能知人年壽修短漢武帝探策得十八因倒讀曰十八其後果壽長八十

博物志曰泰山一曰天孫言為天帝孫也主召人魂魄東方萬物始成故知人生命之長短

五經通義云一曰岱宗言王者受命易姓報功告成必于岱宗也東方萬物始交代之處宗長也言為羣嶽之長

白虎通曰王者受命必封禪封者廣厚也

禪除也為壇字本為禪以

其祭神故從示

皆刻石紀號著已之功績以自効也天以高為

尊地以厚為德故增泰山之高以報天禪梁甫之趾以

報地也

史記曰無懷氏封泰山禪云云伏羲封泰山禪云云神農封泰山禪云云炎帝封泰山禪云云

黃帝封泰山禪亭亭顓頊封泰山禪云云帝嚳封泰山禪云云堯封泰山禪云云禹封泰山禪會稽湯封泰山

禪云云周成王封泰山禪社首

後漢書曰光武封泰山禪梁甫凡云云亭亭肅然嵩里

社首梁甫皆泰山下小山也石閭在西巖下

漢官儀及泰山記曰泰山盤道屈曲而上凡五十餘盤
經小天門大天門仰視天門如從穴中視天牕矣自下
至古封禪處凡四十里山頂西巖為仙人石閣東巖為
介丘東南巖名日觀日觀者雞一鳴時見日始欲出長
三丈許又東南名秦觀秦觀者望見長安吳觀者望見
會稽周觀者望見齊黃河去泰山二百餘里於祠所瞻
黃河如帶若在山陬山南有廟悉種栢千株大者十五
六圍相傳云漢武所種小天門秦時五大夫松見在

茅君

內傳云仙家凡有三十六洞天岱宗之洞週迴三千里名曰三宮空洞之天

列仙傳曰稷丘君者泰山道士也武帝時以道術受賜後上東巡泰山稷丘君乃冠章甫衣黃衣擁琴來拜武帝曰陛下勿上也必傷足上必欲上及上數里左右足指果折乃止

列仙真人傳曰馬明者齊國臨淄人也本姓何字君賢為縣吏捕賊為所傷當時殆死良久忽於道間見一女以肘後管中一丸藥大如小豆與明服之于是即愈血

絕瘡合隨神女還岱宗石室中上下懸絕重巖深隱去地千餘丈其中金牀玉枕乃人跡所不能至

神仙傳曰劉馮者沛人學道于穆王子服石柱英及中岳石硫黃年三百餘歲而有少容後入泰山中

又泰山下老父者失其姓名漢孝武皇帝巡狩見老父鋤于道間頭上白光高數丈因問之父對曰臣年八十五時衰老垂死頭白齒落有道者教臣絕穀但飲水并作神枕枕中有三十二物其二十四物以當二十四氣

其八物當八風臣行之轉少日行三百里今年九十矣
帝受其方賜纁帛去父入岱宗山十年五年時還鄉里
三百餘年乃不復還也

上黨記曰太子坂東頭即泰山也避世者區種而食或
射熊于巖間

泰山記曰泰山廟在山南悉種栢樹千株大者十五六
圍父老傳云漢武所種廟及東西房三十餘間并高樓
三處春秋饗祀泰山君嘗在此壇

周易是謀類曰泰山失金雞鄭玄注曰金雞泰山之精
丘淵之齊記曰泰山東岳也嬴博二縣共界漢武封禪
割此縣以供祀泰山

伍輯之從征記曰泰山于所經諸山為最高見岑嶠軒
舉凌跨衆阜霞雲草木靄然靈異苑囿神奇故無螫蟲
猛獸

孟子曰孔子登東山而小魯登泰山而小天下
尸子曰泰山之中有神房阿閣帝王錄

淮南子曰清之為明杯水而見眸子濁之為暗河水不

見泰山

孟子曰挾泰山以超北海

恒山

亦名常山

史記曰趙簡子謂諸子曰吾藏寶符于常山往得者立
焉諸子競往無所得無恤曰常山臨代代可取也簡子
曰是知符矣遂立之

白虎通曰北方為常山者何陰終陽始其道常久故曰

常山

後魏書曰道武立廟於上置侍祀九十九人歲時祈禱
水旱至成帝東巡親祀其神焉

春秋元命苞曰昴畢散為冀州分為趙國立為常山
崔鴻前燕錄曰慕容雋壽光三年常山寺大樹根下得
璧七十二圭七十光色精竒有異常玉

孫子兵法曰常山之蛇名曰率然一身而兩頭擊其一
頭則一頭至擊其中則首尾俱至

神農本草曰常山有草神農置之門上每夜叱人
常山圖經曰北岳恒山在縣西北一百四十里

尚書禹貢曰太行恒山至于碣石有恒水出焉其下有
祠

又恒山記曰高三千九百丈上方三十里週迴三千里
上有太玄之泉神草十九種道者服之成仙

又太史公云北岳者有五名一名蘭台府二名列女宮
三名華陽臺四名紫微宮五名太乙宮或云太茂山山

北四百餘里號飛狐之口有率然蛇孫吳喻兵勢

管子曰其山北臨代南俯趙東接河海之間早生而晚殺五穀之所蕃熟四種五獲焉

陽固北都賦曰茂丘茂山也蓋恒岳之別名派水從西來甚大至茂山之西沉伏于地過山而復出其大如初世言避恒岳之靈

衡山

周官曰荊州其山鎮曰衡山

徐靈期南岳記曰衡山者五岳之南岳也其來尚矣至

於軒轅乃以瀟

音潛

霍之山為副馬故爾雅云霍山為南

嶽蓋因其副馬

或云衡山一名霍山

至漢武南巡又以衡山遼遠

道隔江漢於是乃徙南岳之祭于廬瀟江山亦承軒轅

副義也

晉書曰劉麟之嘗採藥至衡山深入忘返見有一澗水
末有二石因一開一閉水深廣不得過欲還失道遇伐
木人問道僅得還家或說困中皆仙方靈藥麟之欲更

尋終不復知其處

羅含湘中記曰衡山九嶷皆有舜廟太守至常遣戶曹致祀則如絃歌之聲也

吳越春秋曰禹傷父功不成登衡山血白馬以祭之忽然卧夢赤繡文男子稱玄夷蒼水使者謂禹曰欲得我山神書者齋于黃帝之宮禹乃退齋三日登宛委發石得金簡玉字之書得治水之要也

盛弘之荊州記曰衡山有三峯其一名紫蓋每見有雙

白鶴回翔其上。一峯名石菌。下有石室。尋山徑。聞室中有諷誦聲。一曰芙蓉。上有泉水飛流如舒一幅白練。

山海經曰衡山一名岫嶁。山其上多青腹鳥。多鸚鵡。

岫嶁音

矩嶁音縷

湘中記曰衡山九嶷皆有舜廟。遙望衡山如陣雲。沿湘千里九向九背。乃不復見有玉牒。

劉敬叔異苑曰湘東姚祖太元中為郡吏。經衡山望巖下。數少年並執筆作書。祖謂行旅休息乃過之。未至百

步少年相與飛颺遺一紙書其字皆鳥跡

郡國志云衡山南岳也南岳記云當翼軫度璣衡謂之衡山山有錦石斐然成文

霍山

白虎通曰南方為霍山者何太陽用事護養萬物故為

霍山

爾雅曰大山宮小山曰霍

郭璞注曰宮謂圍繞也禮記曰君為廬宮是也

漢書曰武帝以衡山曼遠識記皆以霍山為南岳故祭

其神於此

宋書曰霍山數年來常有鐘聲潛發重壤山崩間有六鐘自出制度合古式聲中律呂

山海經曰霍山有獸焉其狀如狸白尾方鬣名曰朏朏可以忘憂

黃庭內景經曰霍山下有洞臺方二百里司命君之府也

白虎通曰小山繞大山為霍

欽定四庫全書

太平御覽

太
平
御
覽
卷
三
十
九

欽定四庫全書

太平御覽卷四十

宋 李昉等 撰

地部五

六

王屋山

太行山

霍太山

首陽山

龍門山

岐山

梁山

太白山

峨眉山

岷山

蟠冢山

鳥鼠山

積石山

王屋山

列子曰太行王屋二山方七里高萬仞北山愚公者年且九十面山而居懲山北之塞出入之迂也聚室而謀曰吾與汝畢力平險可乎雜然相許雜猶僉也其妻曰以君之力曾不能損魁父之丘如太行王屋何且焉置土石

雜曰投諸渤海之尾隱土之北遂率子孫荷擔者三夫
叩石墾壤運于渤海之尾隣人京城之孀妻有遺男始
齒往助之寒暑易節始一反馬河曲智叟笑而止之曰
甚矣汝之不慧以殘年餘力曾不能毀山之一毛其如
土石何北山愚公長息曰汝之心曾不若孀妻弱子雖
我之死有子存焉子又生孫孫又生子子子孫孫無窮
匱也而山不加增何苦而不力乎河曲智叟無以應操
蛇之神聞知懼其不已告之於帝帝感其誠命夸娥氏

二子負二山一厝朔東一厝雍南

神仙傳曰甘始太原人善行氣不食服天門冬治病不用針艾在人間三百歲乃入王屋山

茅君內傳曰王屋山之洞迴迴萬里名曰小有清虛之天

太素真人王君內傳曰王屋山有小天號曰小有天周迴一萬里三十六洞天之第一焉

太行山

史記曰酈生說漢高祖曰願足下急復進兵收取滎陽
據敖倉之粟塞成臯之險杜太行之道距飛狐之口守
白馬之津以示諸侯效實形制之勢則天下知所歸矣
神仙傳曰王烈邯鄲人服黃菁松花老而更少嵇叔夜
甚愛之每共入山遊戲烈後獨入太行山忽聞山東北
如雷聲往視山上破數百丈石中有一孔徑尺中有青
泥出烈取搏之隨手堅凝氣味如粳米飯也烈自食數
丸因掘歸以與叔夜即皆成青石打之作銅聲按神山

五百歲一開其中有石髓得而服之壽與天地相畢

述征記曰登滑臺城西南望太行山白鹿巖王莽嶺冠于衆山之表

墨子曰墨子怒耕柱子曰我無喻于子墨子曰將上太行駕驥與羊子將誰驅曰將驅驥足責也墨子曰我亦以子為足責

尸子曰龍門魚之難也太行牛之難也以德報怨人之難也

水經注曰仲尼傷道不行欲北從趙鞅聞殺鳴犢遂旋車而返其後晉人思之于太行嶺南為之立廟蓋往時迴轅處也余按諸子書及史籍之文並言仲尼臨河而歎曰丘之不濟命也夫如是非太行迴轅之言也

博物志曰按太行山而北去亦不知山所限極處亦如東海不知所窮

霍太山

史記曰智伯攻趙襄子襄子懼乃奔保晉陽原過後至

于王澤見三人自帶以上可見自帶以下不可見與原
過竹二節莫通曰為我以是遺趙無恤原過既至以告
襄子襄子齋三日親自剖竹有朱書曰趙無恤余霍太
山徐廣曰在河東永安縣山陽侯天使也三月丙戌余將使汝反
滅智伯亦立我百邑余將賜汝林胡之地滅智伯使原
過主霍太山祠祀

又飛廉先為紂作石槨

徐廣曰作石槨于北始

還無所報乃為壇

于霍太山而報得石棺銘曰帝令處父不與殷亂賜汝

石棺

水經注曰霍太山上有飛廉塚山下有岳陽廟甚靈烏雀不棲其林猛虎常守其庭此則禹貢岳陽也

唐書曰義旗初建高祖自太原起兵西赴關中途經霍邑時隋將宋老生陳兵拒險義師不得進乃屯于賈胡堡會霖雨積旬餽運不給高祖患之忽白衣老人詣軍門請見余霍山神也遺語大唐皇帝若向霍山東南傍山取路八日雨止我當助爾破之高祖初哂之遣人東

南視果有微道高祖笑曰此神不欺趙襄子豈當負吾
邪及八日雨暴霽高祖太悅以太牢祭其山

首陽山

詩曰采芩采芩首陽之巔采芩采芩首陽之下采葑采
葑首陽之東

史記曰伯夷叔齊孤竹君二子讓國而逃聞西伯善養
老往歸焉及西伯卒武王載木主東伐紂伯夷叔齊扣
馬而諫左右欲兵之太公曰義士也舍之伯夷叔齊恥

之義不食周粟隱于首陽山采薇而食之乃至餓死
鑠語曰晉平公與齊景公乘至于澮見人乘白驂八駟
以來平公之前公問師曠曰有犬狸身而狐尾者乎師
曠有頃而答曰有之首陽神其名曰來者首陽之神飲
酒霍太山而歸其居于澮乎見之甚善君有喜焉

戴延之西征記曰洛東北去首陽山二十里山上有伯
夷叔齊祠或云餓死此山今山東蒲坂南又謂首陽山
有叔齊祠未詳餓死所在

山海經曰和山上無草木而多瑤碧實惟河之九都是山也五曲九水出焉合流而北注于河其中多蒼玉吉神泰逢司之是神好居于萑山之陽出入有光

呂氏春秋曰夏后氏孔甲田于東陽萑山遇大風雨皇甫謚帝王世紀以為即東首陽山也蓋是山之殊目矣

龍門山

尚書禹貢曰浮于積石至于龍門西河

孔安國曰龍門在河東之西界

周禮曰大司樂以陰竹之管龍門之琴瑟

陰竹生北

於宗廟

奏之九變則人鬼可得而禮

考經援神契曰禹鑿龍門闢伊闕決江開岷導四瀆鑿龍

門以通河鑿岷山以開江導淮於桐柏導濟于王屋故言導四瀆

漢書地理志云龍門山在馮翊夏陽縣北續漢書同

辛氏三秦記曰河津一名龍門巨靈迹猶在去長安九百里江海大魚俱集門下數千不得上上則為龍故云

曝鰓龍門

尸子曰古者龍門未鑿呂梁未開河出于孟門上

慎子曰河之下龍門其流駛如竹箭駟馬追走弗能及
淮南子曰龍門未闢呂梁未鑿河出孟門之上大溢逆
流無有丘陵高阜名曰洪水大禹通之孟門始見

水經注云風山四十里河水南出孟門與龍門相對即
龍門之上口也實為河水巨阨兼孟門津之名也又有
黃河自峯山西四十里南出孟門山北經禹鑿廣岍崇
深傾崖及捍巨石臨危若墜復倚焉

岐山

易曰王用享于岐山吉無咎

詩曰古公亶父來朝走馬率西水滸至于岐下

又曰居岐之陽在渭之將萬邦之方下民之王

孟子曰大王居邠狄人侵之事之以皮幣不得免焉事之以犬馬不得免焉事之以珠玉不得免焉乃屬其耆老而告之曰狄人之所欲者吾土地也君子不以其所以養人者害人二三子何患乎無君我將去之去邠踰梁山邑于岐山之下居焉

圖經曰岐山亦名天柱山禹貢曰導岍及岐

河圖括地象曰岐山在崑崙山東南為地乳上多白金

周之興也鸞鷲鳴于岐山時人亦謂岐山為鳳凰堆

酈道元水經註天柱山上有鳳凰祠或云其峰高峻迥
出諸山狀若柱因為名焉

梁山

書曰既載壺口治梁及岐

壺口在冀州梁在雍州循山治水在西

詩曰奕奕梁山維禹甸之

奕奕大貌甸治也禹治梁山除水災也

傳曰梁山崩晉侯傳召伯宗伯宗辟重曰辟傳重人曰待
我不如捷之速也問其所曰絳人也問絳事焉曰梁山
崩將召伯宗謀之問將若之何曰山有朽壤而崩可若
何國主山川故山崩川竭君為之不舉降服乘縵徹樂
出次祝幣史辭以禮焉其如此而已雖伯宗若之何

穀梁書曰梁山崩雍河三日不流晉君召伯宗而問之
伯宗來遇輦者不避使車右下而鞭之輦者曰所以鞭
我者其取道遠矣伯宗下車而問焉曰子有聞乎對曰

梁山崩雍河竭三日不流伯宗曰君為此召我也為之奈何曰天有山天崩之天有河天壅之雖召伯宗如之何

爾雅曰梁山晉望也

郭璞注曰晉國所望祭者也今在夏陽西北臨河上也

漢志注曰梁山在夏陽西北即尚書禹貢治梁及岐

詩韓奕篇曰奕奕梁山晉國所望大梁別小梁之號俱在韓城縣界大梁在今縣西又按三秦記梁山宮城又名織錦城

太白山

辛氏三秦記曰太白山在武功縣南去長安三百里不知高幾許俗云武功太白去天三百尺山下軍行不得鳴鼓角鳴鼓角則疾風暴雨兼至也

周地圖記曰太白山甚高上恒積雪無草木半山有橫雲如瀑布則澍雨人常以為候驗之如離畢焉故語曰南山瀑布非朝即暮

魏畧曰吉茂蘇則值亂隱于扶風南太白山中以經籍

自娛

峨眉山

列仙傳曰陸通楚狂接輿也好養性在蜀峨眉山世世見之數百年

華陽國志曰犍為南安縣南有峨眉山去縣八十里地圖云有仙藥漢武求不能得

益州記曰峨眉山南安縣界當縣南八十里兩山首相望如峨眉

岷山

易乾鑿度曰岷山上為井絡

書曰岷山導江東別為沱

江東南流沱東行也

書璇璣鈴曰禹導江水決岷山流九貢

九貢九州之貢

家語曰江始出岷山其源可以濫觴及至於江津不方舟不可以涉

漢書曰成帝時岷山崩壅江水逆流

山海經曰岷山江水出焉

今在汶山郡廣陽縣西大江所出也

其上多金

玉其下多梅多棠其獸多犀象多夔牛

嶓冢山

書曰嶓冢導漾東流為漢

華陽國志曰西岷嶓地稱天府

河圖括地象曰嶓冢山上為狼星上有異花草名骨容
食之無子

烏鼠山

河圖括地象曰烏鼠同穴山地之幹也上為掩畢星渭

水出其中

漢武內傳曰封君達隴西人也初服黃連五十餘年入鳥鼠山于山中服水百餘年還鄉里年如三十常乘青牛號青牛道士也

山海經曰鳥鼠同穴山今在隴西首陽縣西南山有鳥鼠同穴鳥名鷓鼠名鼯鼯如家鼠而短尾鷓如鷓而黃穿地入數尺鼠在內鳥在外而共處

孔安國傳曰鳥鼠共為雌雄

沙州記曰鳥鼠同穴山鳥如家雀色小白鼠小黃而無尾凡同穴地皆肥沃壤盡軟熟如人耕多生黃花紫草

積石山

書曰浮于積石至于龍門西河

穆天子傳曰西濟于河用申八駿之乘以飲于枝時之中積石之南河

山海經曰積石山其下有石門河水冒以西

冒覆也積石今在金

城河門關西南羌中河行塞外東入塞內

是山也萬物無不有

莊子曰鳳之所居也積石千里河水出下鳳鳥居上

太平御覽卷四十